

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 21 1941

5
T 3150/3427.83

浮山縣志卷之三十二

哈佛大學漢和
圖書館珍藏印

祠祀

國之大事祀其一焉故洪範列在八政

國制凡有功德於民者爲壇爲廟爲祠胥秩諸祀典浮山諸禮祀視他邑畧同雖或不載於祀典而有禱輒著靈祐是亦功德及民之徵也法得脩書志祠祀

先農壇

雍正四年
欽奉

上諭通行直省擇潔淨之地照九卿所耕藉田四畝九分設立先農壇知縣周毓正遵制建壇于西郊自雍正

五年爲始每歲仲春上旬亥日令率邑屬耆老農民詣壇致祭照九卿耕藉之例行九推之禮所獲米麥收貯以供祭祀粢盛其建壇并恭祭先農俱動支正項錢糧報部查核儀注照定例行

祭品

帛一 羊一 豕一 簠簋各一 籩豆各一

衛宏漢儀春始東耕於籍田引詩先農則神農也賀循籍田儀漢耕日以太牢祭先農於田所薛綜注二京賦田在國之辰地漢舊儀春始東耕於籍田官祠先農先農卽神農炎帝也祀以太牢賀循云所種之穀黍稷種陸陸早也種晚也干寶周禮注種晚秔稻之屬陸陵穀黍稷之屬五經要義壇於田以祀先農如社月令郡國守相皆勸民始耕如儀諸行出入皆鳴鐘皆作樂其有災青有他故若請雨止雨皆不鳴

鐘不作樂後漢縣邑常以乙未日記先農於乙地秦靜議風伯雨師靈星先農社稷爲國六神晉太始四年耕於東郊以太牢祀先農周舊儀及國朝先農皆配神農於帝社配以后稷則王社先農不可一也今宜於籍田立帝社帝稷配以禹稷則先農帝社並祠叶於周之載芟之義唐常叔夏張齊賢等奏經無先農禮王自爲立社曰王社先儒以爲在籍田也永徽中猶曰籍田垂拱後乃爲先農然則先農與社一神今先農壇請收曰帝社壇以合古王社之義其祭准令以孟令吉亥祠后土以勾龍氏配於是爲帝社壇又立帝稷壇於西如太社太稷而壇不設方邑以異於太社開元十九年停帝稷而祀神農氏於壇上以后稷配宋雍熙中用大祠制景德四年以判太常禮院孫奭言改用上辛後亥日政和四年有司議爲中祠尋復爲大祠元武宗至大三年夏四月從大司農建農蠶二壇壇式與社稷同位在籍田內如社稷

禮樂用登歌日用仲春上丁後或用上辛或甲日記
炎帝神農氏以后稷氏配

社稷壇

制東西二丈五尺南北二丈五尺高三尺四出
各五尺繚以周垣四門紅油由北門入石主長二尺
五寸方一尺埋壇南正中止露圓尖餘埋土中神號

稱縣社之神縣稷之神神牌二以木為之殊漆青字
身高二尺二寸濶四寸五分厚九分座高四寸五分

濶八寸五分厚四寸五分臨祭設於壇上以矮案供
盛祭畢謹藏神庫神厨三間庫房間架與神厨同率

牲房三間已壇在西門外西北百步規模如制每歲
春秋二仲月上戊日致祭儀注遵照部頒行有受胙

有望
瘞

祭品

- 帛四 黑色
- 羊二
- 豕二
- 簠簋各一
- 籩豆各四

按祭法昔歷山氏之有天下也其子曰農能殖百穀

夏之衰也周棄繼之故祀以為稷家語孔子曰古之
平治水土及播殖百穀者衆矣惟勾龍兼於社而棄

為稷神易代奉之無敢益者明不可與等云左傳祭
墨曰稷田正也有烈山氏之子曰柱為稷自夏以上

祀之賈逵鄭元皆云烈山炎帝之號杜預注烈山氏
神農世諸侯按帝王世紀神農本起烈山然則初封

烈山為諸侯後為天子猶帝堯初為唐侯然也魯語
其子曰柱祭法其子曰農者劉炫云蓋柱是名其官

日農猶呼周棄為稷禮疏湯既勝夏廢柱而以棄代
之漢郊祀志或言曰周興而邑立后稷之祠至今血

食天下於是高祖制詔御史其令天下立靈星祠漢
元始中太師光大司徒宮羲和歆等八十一人議漢
興禮儀稍定已有官社未立官稷遂於官社後立官

稷以夏禹配食官社后稷配食官稷種穀樹師古
曰穀樹楮樹也其子類穀故于稷種臣瓚曰高帝除
秦社稷立漢社稷禮所謂大社也時又立官社配以
夏禹所謂王社也見漢祀令而未立官稷至此始立
之世祖中興不立官稷相承至今也後漢禮儀志郡
縣置社稷太守令長侍祠牲用羊豕唯州所治有社
無稷以其使官古者師行有載社主不載稷也宋志
以春秋二仲及臘日祭太社太稷爲大祀其州縣祭
社稷如小祀春秋二祭刺史縣令初獻上佐縣丞亞
獻州博士縣簿尉終獻牲用少牢元豐中令州縣社
主用石元祐中又下祭服制度于郡縣明制府稱庠
社府稷之神州縣稱州縣社稷之神歲春秋二仲上
戊日有司
肅祀

風雲雷雨山川壇

在南門外西南百步 按明洪武元
年令天下府州縣立壇祀境內山川

六年以風雲雷雨合祭又以城隍合祭壇制與社稷
同但門由南入不設石主壇設三神位風雲雷雨居
中山川居在城隍居右神號稱風雲雷雨之神本縣
境內山川之神本縣城隍之神

國朝因之每歲春秋二仲月上巳日致祭儀注與社稷同
惟臨祭時執事先以毛血瘞于坎通贊不唱瘞毛血
主祭者望燎不
望瘞有受胙

祭品

帛七

風雲雷雨四

山川二

城隍一

羊三

豕三

簠簋各一

籩豆各四

按周禮大宗伯以禋燎祀風師雨師漢志雍有二十
八宿風伯雨師四海之屬百有餘廟師古曰風伯飛

廉也雨師屏翳也一日屏號而說者乃謂風伯箕星也雨師畢星也此志既言二十八宿又有風伯雨師則知非箕畢也後漢縣邑常以丙戌日祀風伯於戌地以己丑日祀雨師於丑地用羊豕唐制諸郡置風伯壇社壇之東雨師壇于西各稍北數十步早下於社壇祀用羊一豕豆各八簋簋各二宋咸平二年旱詔有司祀雷師雨師大中祥符初詔惟邊地要劇者通判致祭餘皆長吏親享熙寧中有司請北風師于西郊祠以立春後丑日北雨師于北郊祠以立夏後申日仍依熙寧舊儀以雷師從雨師之位又請用栢柴升煙以歆神又請用樂製樂章以為降神之節元制風伯旗青質赤火焰脚畫神人犬首朱髮鬼形豹汗膊朱袴負風囊立雲氣中雨師旗青質赤火焰脚畫神人冠五梁冠朱衣黃袍黑襪黃帶白袴皂烏右手仗劍左手捧鐘雷公旗青質赤火焰脚畫神人犬首鬼形白擁項朱犢鼻黃帶右手持斧左手持鑿運

連鼓於火中電母旗青質赤火焰脚畫神人為女子形纁衣朱裳白袴兩手運光

八蜡廟 在北門外府君廟左

按蜡之為祭所以報本反始息老送終也伊耆氏始為蜡蜡者索也歲十二月合聚萬物而饗索之蜡之義其有取于斯與蓋自伊耆氏以下蜡祭之禮皆所不廢夏更曰嘉平商曰清祀周曰大蜡今八蜡廟亦古之遺意也每歲春秋二仲月上戊日致祭

- 一曰先穡
- 二曰司嗇
- 三曰農
- 四曰郵表畷

- 五曰貓虎
- 六曰坊
- 七曰水庸
- 八曰百穀

祭品

帛一 羊一 豕一 簠簋各一 籩豆各四

城隍廟

在縣西街明洪武初增修正德間知縣顏德趙資隆連守珪相繼葺治

國朝康熙十年知縣邱士鏞重修典史戴日杲捐俸建寢宮乾隆六年邑官張嗣昌倡募合邑重修張體智獨力捐建享殿三楹前後增其舊制規模宏敞廟貌倍加壯麗按神前代各有封號明洪武三年五月詔定稱本府州縣城隍之神與風雲雷雨山川並壇而祀國朝因之每歲仲夏十一日邑人享報于廟

關帝廟

在縣南街明萬曆乙酉年建

國朝順治己亥邑令楊名世重修有記乾隆四年邑官張垚捐貲增拓重修有記封爵謹按 帝仕漢建安中封漢壽亭侯後漢景耀三年秋追謚故前將軍曰壯繆侯宋徽宗時加封崇寧真君大觀二年加封武安

王建炎二年春加封壯繆侯王淳熙十四年冬加封英濟王明洪武元年復稱漢壽亭侯嘉靖十一年稱漢將軍壽亭侯萬曆十八年加封神聖文武協天護國忠義帝勅解州廟名英烈四十二年冬加封三界伏魔大帝神威遠鎮天尊關聖帝君

國朝順治九年

勅封忠義神武關聖大帝按廟祀宋大中祥符時祭以四月八日乃王儼監兵破重尤受封爵之日也明洪治三年定春秋二祀

國朝順治元年定每歲五月十三日祭九年以四月八日

五月十三日祭六月廿四日以大年祀雍正三年勅封帝三代以公爵會祖為光緒公祖為裕昌公考為成

忠公府州縣各立廟並祀蒸嘗雍正五年復奉特旨以太牢祀 帝每歲春秋二仲月各致祭一次五月

十三日復致祭為一歲三祀儀注照定例行一在北門外明崇正庚辰建一在縣南十里梁村溝

國朝康熙五十八年生員賈作棟募建一在南關宋時創
建元明重修康熙五十五年重建

前殿祭品

帛一 牛一 豕一 羊一 簋簋各二 籩豆各

十

後殿啓聖祠祭品 三案

帛各一 羊各一 豕各一 簋簋各二 籩豆各

八

馬壇 在北門外每歲清明日七月望日十月朔日祭無
祀鬼神名曰厲祭宛期縣官牒告 城隍至日

神位於壇上主之又設無祀鬼神于壇下左右
詣壇致祭儀注如制行

祭品

正位 羊一 豕一 壇下 羊二 豕二 解置

羹飯 用米 香燭 隨用 酒紙 三石

祭文

維某年月日某官某遵承禮部劄付為祭本縣闔
境無祀鬼神等眾事欽奉

皇帝聖旨普天之下后土之上無不有人無不有鬼神人
鬼之道幽明雖殊其理則一故天下之廣兆民之眾
天子必立君以主之君總其大又設百官分職於府州縣以
各長之各府州縣又於每一百戶內設一里長以綱

領之上下之職綱紀不紊此治人之法如此

天子祭

天地神祇及天下山川王國各府州縣祭境內山川及祀
典神祇庶民祭其祖先及里社土穀之神上下之禮
各有等第此事神之道如此尚念冥冥之中無祀鬼
神苟為生民未知何故而歿其間有遭兵刃而橫傷
者有死於水火盜賊者有被人取財而逼死者有被
人強奪妻妾而死者有遭刑禍而負屈死者有天災
流行而疫死者有為猛獸毒蟲所害者有為飢饉凍
死者有因戰鬪而殞身者有因危急而自縊者有因
墻屋傾頽而壓死者有死後無子孫者此等孤魂或
終於前代或歿於近世或兵戈擾攘流移於他鄉或
人煙斷絕久缺其祭祀姓名泯沒於一時祀典無聞
而不載此等孤魂死無所依精魂未散結為陰靈或
倚草附木或作為妖怪悲號於星月之下呻吟於風
雨之時凡遇人間節令心思陽世魂杳杳以無歸身

墮沉淪竟懸懸而望祭典言及此憐其慘悽故教

下有司依時祭享在京都有泰厲之祭在王國有國
厲之祭在各府州有郡厲之祭在各縣有邑厲之祭
在一里又各有鄉厲之祭期於神依人而血食人敬
神而知禮仍命本處城隍以主此祭欽奉如此今某
等不敢有違謹設壇於城北以某日置脩牲醴羹飯
專祭本縣圍境無祀鬼神等眾靈其不昧永享此祭
凡我一縣境內人民倘有忤逆不孝不敬六親者有
姦盜詐偽不畏公法者有拗曲作直欺壓良善者有
繫避差徭靠損貧戶者似此頑惡奸邪不良之徒神
必報於城隍登露其事使遭官府輕則笞決杖斷不
得號為良民重則復流絞斬不得生還鄉里若事未
發露必遭陰譴使舉家並染瘟疫六畜田蠶不利如
有孝順父母和睦親族畏懼官府遵守禮法不作非
為良善正直之人神必達之城隍陰加護佑使其家
道安和農事順序父母妻子保守鄉里我等闔縣官

吏人等如有上欺
朝廷下枉良善貪財作弊蠹政害民者靈必無私一體昭
報如此則鬼神有鑒察之明
官府非誥諛之祭尚饗

鄉厲祭 凡各鄉每里一百戶內立壇一所歲清明日七
月望十月朔祭無祀鬼神牲醴隨俗行之

帝堯廟 在縣東八里堯山上相傳堯嘗避暑於此有歷
代碑記金皇統三年邑宰牛承直重修高平范

纂記

國朝康熙四十九年知縣張昌吉捐俸建立正殿三楹東
偏建老君殿三楹繞以垣墉訓導李長榮記乾隆六
年知縣李允捐俸邑宦張圭翰資倡眾重修以大舜
大禹配享又建東西兩廡並祀丹朱泰伯仲雍伯夷
叔齊其大門二門俱煥然一新為浮邑大觀監生侯
掄賢生員張煦等
督修

禹湯廟 在縣北十里南王村唐時創建元大德九年錄
事次永之重修以伯益伊尹配享

國朝康熙間本村齊至盛率子生員人龍
重修

司空廟 即大禹也在縣東南二十里風穴山上一名司
空山

成湯廟 在縣北街明崇正八年廩膳生員侯謨等募化
創建

國朝康熙三十五年生員張三奇侯天桂等督工重修歲
六月十五日北街居人聯社報祀

東嶽廟 在邑東門外元天歷間
重建

國朝康熙三十六年知縣盧承宗捐俸首倡重修耆賓許
企浩歲貢劉思恭段袞龍等督工明倪岳正祀典疏
洪武三年詔封東嶽泰山之神有司春秋致祭有事
則遣廷臣祭告今朝陽門外有東嶽廟實自元延祐

中元教大宗師張留孫買地為宮奉祀東嶽天齊仁
聖帝後仍而不廢歲以三月二十八日致祭

大生廟 即東嶽神在縣南十里大衛村金天春間初建
正殿大定癸卯年里人孔慶祖繼成之規制閏

散鄉貢進士
李熙載記

馬王廟 在縣西街羅漢寺東

龍王廟 一在縣西街金元時建乾隆六年合邑重修
在縣西二十里浮塔鄉前有龍池

三官廟 一在縣西門外陀郎廟左明嘉靖二十年建
在小邢村

國朝康熙間邑宦張壺
重修

堯姑廟 在縣西北三十里楊村河西

聖母廟 一在南街生員張德修一在西街張德修
西邑宦張再齡重修一在北關府君廟右一在

南關火星廟側邑宦張壺創建歲暮春二十日邑人
各報享焉

后土廟 在縣東二十里東要村明洪治戊午李春重修
知縣王綸有記

真武廟 一在西街乾隆六年合邑重修一在縣東南
里天壇山宋時建金太和間重修明倪岳正

與疏北極佑聖真君者真武神也真武本元武宋
宗避聖祖諱改元為真元龜也武蛇也此本北方元

武七宿虛危星形似之故因而名後乃以元武為
聖而作龜蛇於下靖康初詔加號助順日佑聖助順

真武靈應真君圖誌又云真武為靖樂王太子遇紫
虛元君長以道秘東遊遇天神授以寶劍入武當山

修煉功成白日飛昇奉上帝命鎮北方披髮跣足建
皂纛元旗統攝元天之位明太祖于雞鳴山建廟太

宗于京城長隅并武當山各重建廟宇而兩京歲春
秋及京師月朔望各遣官致祭武當山則命內外官
員專一提督憲宗嘗範金為像屢遣內官陳善齋往
武當安奉

聖王廟

在縣東二十里安裡莊明洪武初建基宇崇因
東路七十餘社鄉民報賽於此

清源王廟

在縣東南十五里濟廟溝金大定二年建廟
前有池池水幽深清徹土人名濟水眼

洪道真君廟

在縣北八里柏村溝宋時建元元統三年
羽士許維崇重建三門修廊廡二間前構

石橋教諭宋文鼎記又名小澗龍王歲四月八日土
人聯社報賽

祭風圪塔

在縣東北四十里為邑中諸山最孤高境每
大風傷禾稼鄉人於此祭之輒止

嘉澗侯廟

在龍角山東峰上有泉曰華池唐開元十八
年勅建祀之伯德來宣和七年勅封嘉澗侯

今稱二峯神歲四月八日
有司詣山致祭

孚祐將軍廟

在龍角山西峯上祀羊角哀宋開寶六年
重修校書郎李承翰記

唐太宗廟

在縣北四十五里名秦王嶺太宗既破宋老
生於霍邑從霍山東分兵間道潛行至此曾

率游騎轉戰於柏壁村
因立廟祀之

武則天廟

在縣西南二十里月山上俗號婆婆神唐時
建元至正元年五月重修明萬曆戊戌里社

捐資重
修

無佞佞廟

在縣西南十里梁村唐時建明宣德辛亥縣
丞賀琳禱雨獲應度前隙地重建正殿三楹

後知縣陳榮李鶴王鏜相繼增拓獻殿寢殿大門皆
稱宏整萬歷七年知縣左桐重修舊傳神臨汾人為

神山令使民築堰引潞水灌田又嘗陰助唐太宗伐宋老生有功封護國顯應無佞侯明季追封無佞王歲旱有禱輒應故民祀焉按唐高祖武德二年始析襄陵地置浮山縣而太宗伐宋老生在隋煬帝大業十三年爾時尚未置縣焉得有今日且日陰助似已沒而為神其時代胥莫可考明季追封亦不紀年不著緣起姑志以存疑

李靖廟 在縣北二十里王村鎮唐時建土人相傳李衛公征劉黑闥屯兵於此因立廟焉

濟濟廟 在縣東南十八里明嘉靖十九年重修陳大紀記

火星廟 在南關雍正十三年乙卯閏四月邑宦張垚捐貲創建歲正月二十九日聖誕獻牲演劇放火前後四日亦有販鬻牲畜貨物者

府君廟 在縣北門外康熙三十八年重修歲六月六日逢府君誕辰邑人報祀按府君姓崔諱珪字子

玉邠州古城縣附郭村人父公讓母劉氏恤災救苦濟困扶危年屆五旬尚未有嗣因禱于泰山東嶽夜夢神將贈美玉一塊光耀滿室覺後夫婦連夢皆同遂懷孕生府君甫七歲穎悟絕人年十六娶盧氏琴瑟調和孝德其彰隋仁壽三年舉孝廉除太子府博監辭不受唐貞觀元年起授兵部員外郎外遷長子今時邑境假頭寨有婦馮氏姿甚美為鬼魅所纏其夫訪於府君曰此三皇廟鬼祟也授以劍令候夜至拔劍斬之其夫如命鬼來斫之被傷而去及往三皇廟踏跡果一泥鬼自裂馮氏得安又邑南岡村猛虎為害食樵夫康孝和伊母妻訴於府君令具狀即據狀為文屢移山神虎即咆哮躍出隨至縣庭府君書之日爾食良民罪應死今誅爾能甘罪乎虎伏地頓首乃杖殺之於是邑無虎患一日謁白雲寺見一僧

形容枯瘦府君曰得無被妖乎僧稟云有美婦浹姓
素衣每夜以漏下至府君授之杖曰擊之可滅鬼僧
果以杖擊之妖婦啼泣而去踪其血跡果於常平倉
側前死一大白鼠僧得無恙貞觀十八年遷衛縣令
時衛河之溢壞民田廬死者無算府君祀於河神投
一劍波瀾立平見一巨蛇死浮水面其害遂息十九
年陞蒲州刺史值后成長孫無忌西征還府君見之
曰公為妖狐侵善弗治且死無忌上驚詢其故府君
曰妖非他即公新夫人也請見不出遂入斬之但聞
哀鳴聲府君曰已斬之關王歎矣往視見一蒼白狐
斷腰而死府君所至除奸摘伏盡理陽夜理陰每奇
神異貞觀二十二年十月初十日府君與楊叟晏罷
見黃衣執符言曰上帝以玉帶玉圭冠衣召赴五岳
衛兵五百人舞畢奏樂詔之樂又取白馬至府君命
子敬嗣等三人取紙筆曰吾將去矣遂書白字以
相傳以為白字碑書六十四歲其子遵遺命遂葬

磁州滏陽西北鼓山之側立有墓碑祠宇土人報祀
不絕後安祿山反元宗幸蜀夢府君見曰駕勿別往

祿山必滅矣後還闕立廟祀之封顯聖護國嘉應侯
後德宗避難忽有白馬前導送至斜口之谷武宗加

封護國顯應王勅有司祀之宋祥符元年加封東嶽
岱山護國西齊王高宗為康王時副使王雲逼康王

入質於金府君默令磁民殺王雲康王南奔至江無
舟危急之際忽見一神控白馬以待遂得渡奏曰臣

乃磁州崔某也忽不見後康王卽位於杭是為高宗
遂加封護國顯靈真君金封亞岳之神攝行南岳事

元成宗加封靈惠齊聖廣祐王夫人加封順祐靈懿
夫人自明迄今祀典未嘗闕焉子敬嗣房州刺史孫

悅洛州司戶曾孫光迪太子贊善玄孫杭揚州司馬
來孫玄亮禮部尙書弟孫芻言昭義節度判官仍孫

貽孫吏部
侍郎

浮山縣志卷之三十三
楊公祠 在東門外祀知縣楊三辰

楊公祠 在城 街祀知縣楊名世

盧公祠 在東張鎮祀知縣盧承宗

陸公祠 在西街城隍廟左祀知縣陸張烈

三公祠 在天聖宮祀知縣盧承宗周毓正陳政

李公生祠 在堯廟內祀知縣李允

張公祠 在天聖宮祀舉人張大統

張公祠 一在堯廟內一在南門外祀通議大夫原任鄆縣知縣張堯

浮山縣志卷之三十三

寺觀

二氏之學儒者多排擯弗載乃琳宮梵宇綿代輝煌而

浮山之照灼簡編者且繇天聖玉兔諸宮寺顯昔太史

公敘六家獨推尊黃老裴晉公捨其宅爲禪室二公賢

者且如此豈竺乾苦縣之業有卒難毀廢者耶志寺觀

羅漢寺

在縣西街大德七年地震圮僧法安法隱重修規模宏麗朝賀習儀於此

玉兔寺

在縣西南十里故縣村神山縣廢城也唐武德二年平陽西北今汾西地有玉兔見遣使祭之

勅建玉兔觀麟德初兔復見勅增修萬歲通天二年兔又見履空而行遣中使王文泰求獲玉兔偕平陽守杜承衍躬往兔出徐步趨之經數日兔至平陽東神山縣西南隅即今故縣城而隱隱處穿地丈餘獲玉石兔一軀端麗無比上貢后命建玉兔觀於其地長安二年河東路巡按使刑部尚書李景副使王永署平陽守錢光演同遊觀中於風穴山脚下見二僧引十餘巨虎項放白光言此地有虎患吾伏之告以姓氏言訖而化因奏改觀為寺後唐清泰二年正月十八日獵人見玉兔入穴掘之見庵門啓視容像如生有羅漢現身記元大德七年地震寺廢僧法雲重修至正五年邑人段昞撰記明洪武間置僧會司改置羅漢院弘治間僧昌能重修邑令趙資隆記寺有宋明道二年僧靜萬集王右軍書賈昌朝王隨詩按萬歲通天二年九月始改神功元年故有二年

大義寺

在西南二十里張堡村金大定二十九年元正間僧圓印修乙未春重粧佛像捐粟穀

一百石山因畝
詳見道公碑

天聖宮

在西南三十五里羊角山之麓唐武德二年二月老子見於大樹下衣冠儼若髮皓然白馬

在前青童侍側謂里民吉善行曰吾唐皇帝之遠祖也言訖不見遂詣長安奏聞命左親衛都督杜昂於羊角山祈祭老子再見復命有司於其地建祠改羊角山為羊角山并改浮山縣為神山縣開元十四年詔改慶善觀御書額及碑文賜之命高力士董修前老君殿次三清殿又次三皇殿內有六聖御容後唐長興中增修宋景德二年二月甘露降殿栢白鶴來翔勅建前後三門道院行廊大小三百餘間天聖五年詔改觀為天聖宮大中祥符七年遣宰相王旦奉玉冊玉寶上徽號曰太上老君混元上德皇帝八年

古柏別生槐高一丈有奇觀東南峰有洞唐大曆中嘗勅以玉簡金龍投其中至晉天福間有奉使新羅者至其國見二寶出水中還長安表進內有唐金錄齋頌碑觀有古柏千株郡東第一勝境附錄唐高宗自以李氏老子之後命樂工製道調詔道士司馬承微製元真道曲茅山道士李會元製大羅天曲工部侍郎賀知章製紫清上聖道曲以合奏於慶唐之觀及太清宮成太常卿韋緇製景雲九真紫極小長壽承天順天樂六曲亦備奏焉乾隆二年邑舉人張大統倡捐重修

清微觀

在縣西北五里宋元祐七年建有記

修真觀

即洪禧萬壽宮在縣東十五里大衛村南宋理宗時建元至元元年碑記畧曰集虛真人蓋志勤有門弟子孔志純家世浮山大衛山之別墅祖世其兵在壬辰正月朔與適彼開闢耕稼至甲午正月

十一日值志勤誕辰遠近咸往里人馬英馬榮諸日惟家之故址崗雄勢堪匪俗亦可居願施為焚修之所志勤請額于清和尹真人名曰修真辛丑鄉舊郭復施附觀祖基然後額度形勢與之更始凡經營數年殿宇廊廡及諸寮舍有極壯麗焉元大德四年道士王志卓復請改額于元逸張真人曰洪禧萬壽宮翰林學士知制誥同修國史廣平王德淵記


龍祥觀

在縣東南舊有天壇三清廟歲久傾圮大定乙未行縣石抹安運公自并立軍移率是邑親履其地周覽遺址詢之鄉進士劉者知為天壇勝跡出俸粟二十斛倡建邑人張敏張宜楊道清龐和等佐成之太和壬戌正月晦日將仕郎隰州縣主簿段時可記

寧真觀

在縣西八里辛村元延祐七年建明洪武間置道會司後併洪禧二真龍祥太清太華五觀入

焉



浮山縣志卷之三十四

祥異

昔周設保章氏以察妖祥春秋列國太史各省其國之所屬辨其吉凶浮雖一邑其地大於陳蔡滕薛諸封多矣夫惟識微之君子遇祥不喜遇災不玩鑒往事以恐懼修省雖雉鳴祥桑皆家國之吉矣志祥異

附唐

堯之處有草生焉曰莧莧十五之前日生一葉十五之後

日落一葉小建則一葉厭而不落觀之可以知旬朔故

又名歷草史記堯時菅莢攻階而生舜亦如之帝王世紀或云即

朱草按大戴禮朱草日生一莢至十五日後日落一葉周而復始則其莢類爾孝經援神契云朱草生莢

莢孳乃二物也抱朴子又名仙茅云聖王仁功濟天下者堯也天降精

於庭為薤感百陰而為苜蓿世紀典術通志按吳氏本草苜蓿名堯薤

在位七年麒麟遊於藪澤唐書堯即政七十載德政清平

比隆伏羲鳳凰巢於阿閣驩林尚書堯為仁君一日十

瑞宮中易化為承鳳凰止於庭神龍見於宮沼歷草生

堦宮禽五色鳥化白神水生蓮筴蒲生厨景星耀於天

甘露降於地是為十瑞任昉述異記堯時有屈軼草佞人入

朝則屈而指之名指佞草博物志堯時嘉禾七莖三十五

穗詩含神霧陶唐之世南夷有越裳氏重譯來朝獻神龜蓋

千歲方三尺餘背有科斗文記開闢以來堯命錄之謂

之龜歷鄭樵通志堯遭洪水而民無菜色楊震傳桐挺東廂於

是訪桐以定閏路史日月如合璧五星如連珠宋符瑞志堯率

舜等避首山觀河渚有五老飛為流星上八昴論語堯

遊河渚赤龍負圖以出圖亦如綈

春秋元命苞

堯時三年耕

餘一年食謂之升平九年耕餘三年食謂之登平二十

年耕餘七年食謂之太平

兔園策注

太平之時雲則五色而

為慶三色而成喬

呂氏春秋於長子之南山經日不散因名山為

通志按舊志五色雲現

慶筮脯生於廚

符瑞志葉小根根如絲轉而成風殺蠅堯時坐

筮脯一名倚扇狀如蓬大枝

於堯時有獬廌緝其毛為帝帳

田俵子

張揖漢書注曰獬廌似鹿而一角人

君賞罰得中則生於朝廷觸不直者

又論衡云廌一角羊也青色四足或曰似熊

角之羊也性知人有罪臯陶治獄其罪疑者令羊觸之

堯時龍馬銜甲赤文綠色

臨壇上甲似龜廣袤九尺上有五色文

春緯

周

襄王三年雨金於晉

竹書紀年

靈王十四年秋八月丁巳日有食之董仲舒劉向以為晉

大夫專政之象

貞定王三年乙亥晉地震

綱目前編

考王八年彗星見十二年癸丑無雲而雷

舊通志

桃李冬

實綱目前編

手山錄卷之三十四 祥異

威烈王三年晉大旱地生鹽竹書紀年冬十一月晉有大火下

於北方其聲如鼓 四年四月晉大雨雪

安王十五年魏大風晝昏竹書紀年

頃王九年魏彗星見 十年魏星晝墜有聲史記

秦

始皇四年晉大雪舊唐志

漢

文帝三年秋天下旱漢五行志

景帝中三年正月丁亥金木合於觜觿為白衣之會三月

丁酉彗星夜見西北色白長丈在觜觿旦去益小十五

日不見 五年四月乙巳水火合於參天文志

景帝後二年秋晉大旱冬十月日月皆赤十二月雷日

色如紫五星逆行太微月貫天市中舊唐志

宣帝本始元年四月壬戌甲夜辰星與參出西方天文志

元帝五年夏四月有星孛於參漢書

哀帝建平元年十二月白氣出西南從地上至天出參下

貫天厠廣如一疋布長十餘丈十餘日去

天文志 按舊志訛作元

帝永光

元年

後漢

光武帝建武十二年雨雹大如杯壞敗吏民廬舍

五行志注

章帝建初五年二月戊辰木火俱在參

古今注

和帝永元元年正月辛卯有流星起參長四丈有光色黃

白古今注口癸亥參在參 七年二月癸酉金火俱在

參 十六年四月戊午客星從紫宮西行三斗

安帝元初元年六月丁巳河東地陷

延光二年春正月河東大風三月河東大風拔樹

桓帝建和元年秋七月河東言木連理

後漢書

河東有嘉瓜

兩體同帝

宋符瑞志

● 二年七月河東地裂

靈帝建寧四年五月河東雨雹山水大出漂壞廬舍五百

餘家注袁山松書曰是河東水暴出也河東地裂十二

處裂者長十里百七十步廣者三十餘步深不見底

五行

志

晉

武帝咸寧二年八月庚辰地震

晉五行志

太康元年雨雹傷木麥三豆

五行志

惠帝永寧元年十月風雹折木傷稼

五行志

北魏

永平三年夏四月禽昌襄陵二縣大疫自正月至此月

死者二千七百三十人

北史

孝明帝熙平元年十二月甲辰月暈東井觜參五車占曰

大旱

天象志

出帝永熙元年十一月辛丑有大流星出昴北東南流轆

畢貫參光明照地有聲如雷

天象志

東魏

孝靜帝天平四年四月乙酉并肆汾建晉東雍南汾秦陝

九州霜旱人饑流散開倉賑恤

北齊書

元象元年八月東雍州獻嘉禾

靈徵志

武定六年五月晉州上言木連理

北齊

武成帝河清二年四月并汾晉東雍南汾五州蟲旱傷稼

遣使賑恤十二月大雨雪連月南北千餘里平地數尺

霜晝下

北齊書

隋

文帝開皇二十一年十一月戊子立晉王廣為太子是日

天下地震

湯帝大業八年天下旱百姓流亡六軍凍餓死者十八九

五行

志

唐

太宗貞觀二十三年冬十一月乙丑晉地震給復二年賜

壓死者人絹三疋

舊書

按五行志河東地震晉州尤甚壓死五千餘人

高宗永徽元年四月己巳晉州地震二年冬十月辛卯

晉州地震

舊書

武后垂拱三年天下饑

五行志

元宗開元十五年天寶三年正月改年日載晉州大水五行志

肅宗乾元二年至德三載二月改載仍日年四月丁巳有彗星色白長

四尺東方疾行歷畢昴觜觿參至右執法西九五旬餘

昴畢為趙參為唐天文志

代宗廣德二年十二月丙寅有長星出於參舊書天文志其長亘天

長星彗屬參唐星也九年晉州神山縣慶唐觀枯檜復生五行志舊通

志作興十年九月戊申月暈熒惑畢昴參東及五車暈

中有黑氣乍合乍散十二月丙子月出東方上有白氣

十餘道如匹練貫五車及畢觜觿參中夜散去占曰其

宿則晉分也天文志

憲宗元和十二年六月晉州水害稼五行志

宣宗大中六年三月有彗星出於觜參天文志云參唐星也

懿宗咸通三年十二月晉州地震五行志云壞廬舍地八裂泉湧泥出清色

年正月丁未地大震五行志云河中晉絳三州地震壞廬舍人有死者

僖宗乾符五年秋大霖雨河水溢流害稼 中和三年晉

州地震

五代迄明洪厓子墓萬年燈屢見屢隱

五代晉

廢帝天福八年四月天下諸道飛蝗害稼食草木葉皆盡

宋

太祖建隆二年七月邑之北谷中有鐵隨水流出方二丈

三尺其重七千觔三年晉州民家多生魃宋五行志十二

月戊戌晉州饑賑之宋史

乾德元年二月辛亥晉州饑命發廩賑之宋史

太宗淳化二年晉州旱宋史

真宗景德二年晉州及神山縣甘露降五行志

大中祥符八年八月邑之慶唐觀古柏中生槐長一丈

大有餘

仁宗天聖三年冬晉州饑發粟賑之宋史

明道二年河東蝗

神宗熙寧四年四月二日晉州禾異壟同穗五行志

哲宗元符元年晉州禾合穗五行志

遼山縣志 卷之二十四
徽宗建中靖國元年晉州禾合穗

五行志

崇寧元年春正月丁丑地震詔賜錢有差

宋史

宣和二年諸路蝗

遼

太宗會同四年九月壬申有星孛於晉分

遼史

金

後廢帝大安元年十一月丙申平陽地震有聲自西北來
大戊戌夜又震自此時復震動浮山縣尤劇城廨居民圮

者十七八死者九二三千人詔平陽地震人戶三人死

者免租二年二人及傷者免一年貧民死者給葬錢五

千傷者二千六月大旱賑貧民闕食者

五行志

宣宗興定三年五月壬子太白晝見於參

金史

元

世祖至元十三年平陽路旱 十八年三月平陽等路饑

民流移就食有饑而死者

成宗元貞元年七月旱蝗

大德七年八月地大震 九年五月癸亥以地震改平

陽路為晉寧路六月晉寧等郡大雨雹害稼嘉禾生

十年閏正月晉寧地震不止 十一年七月晉寧路水

武宗至大元年五月晉寧等處蝗 五行志

仁宗皇慶二年三月晉寧饑 元史

延祐二年二月戊辰晉寧等處民饑給鈔賑之 三年

九月己未晉寧等郡地震 五行志

泰定帝泰定二年六月晉寧饑 元史 四年八月晉寧旱

政和元年三月晉寧 如饑賑之

文宗天歷二年癸丑晉寧路饑 五行志

至順元年七月蝗聞 七月辛卯隕霜殺稼 二年四月

大旱不能種告饑六月蝗

順帝至正七年十二月晉寧饑 十九年九月丙午夜白

虹貫天 二十三年九月庚申平陽路有白氣三道一

貫北極一貫北斗一貫天漢至夜分乃滅

明

洪武永樂成化洪治間洪厓子墓萬年燈屢見其光甚盛
宣宗宣德二年山西大饑流移十萬餘口

英宗正統六年山西民饑

憲宗成化十二年山西京師黑青見 二十年大旱饑殍
盈野 二十一年正月朔日地震者三是年民大饑人
多相食

孝宗洪治十八年乙丑春夏無雨河東州縣大旱禾稼枯
死秋田未種赤地遍野米價騰湧民饑無食多有剽劫

皮以充饑者

世宗嘉靖三十四年十二月地大震聲如雷壞廬舍壓死
者甚眾月餘始息

穆宗隆慶二年旱蝗

神宗萬曆十三年冬至六月無雨 十四年大旱赤地千
里餓孳盈野疫癘死者枕藉三月發帑賑之 三十四
年夏五月星書見十餘日 三十八年旱饑秋八月疫
癘多喉痺一二日輒死 四十年大疫 四十三年蝗

蝻害稼 四十三年乙卯萬年燈復見是年高捷登鄉
科邑自陳孜成化壬辰得第後至此已二十有餘年高捷
始登科識者謂為科名之瑞應云

懷宗崇正十二年蝗蝻食禾十四年以累歲大旱海饑粟
貴如珠百姓食糟糠剝樹皮掘草根甚至人相食鬻子
女僅易一殮在襁褓者父母棄之道路不顧而去商旅
不敢獨行餓殍盈野慘不忍目

國朝

聖祖康熙元年黃河清 壬子萬年燈復見悶燥燁燁有

似蓮炬是年喬昌齡登鄉科 十六年邑東四十里橫

嶺乃通上黨一帶大路居民客舍在焉汲道維艱人甚

苦之十月間道旁突出數泉色清味甘居民便之知縣

潘廷侯詳其事上憲均褒獎之 三十年六月大旱蝗

詔發穀賑濟仍蠲免田租 三十一年又旱上年蝗生子

名蝻為災無禾民饑奉

旨蠲賑仍

詔所司撫卹 三十二年大有麥 三十四年四月初六

日亥時地大震臨汾洪洞翼城浮山尤甚壞廬舍十之

五壓死者數萬餘人民皆野處奉

旨發帑散賑又給貧民修葺銀每間一兩并發西安庫帑
修築城垣官廨學舍百姓困苦者數十年 三十七年

夏旱民饑瘟疫盛行奉

旨蠲免二年錢糧仍發倉穀賑濟 四十三年邑東二十

里南原上民間耕牛產麟其角肉鈴鱗奇異有如繪形

聖民慮報官滋擾數日不給食而斃自產麟之後浮邑

人民漸有起色 五十五年夏五月楊村河史壁一帶

冰雹如鵝卵打禾殆盡 五十六年三月天鼓鳴洪厓

子萬年燈見是科丁酉席豐張大統同登鄉薦 五十

九年秋不雨無禾冬復無雪 六十年大旱自春至夏

無雨赤地數千里游饑市斗米五錢府大斗米八錢民

饑乏食樹皮草根剝掘殆盡合邑紳士各捐粟銀不等

在城隍廟擇極貧不能舉火者按口按日散米濟賑更

六
賴商販粟米自湖廣江南山東河南輓運至清化復資
騾馱出太行山路一帶晝夜絡繹不絕運至平屬民得
以生旋蒙

特旨遣左都御史朱公軾賫帑散賑維時浮邑百姓無流
離逃竄之苦至六月初旬始雨二十六日大雨四野沾
足穀黍廣布嗣是夜雨晝晴秋禾大稔

世宗雍正三年大稔 四年大有年 五年秋大有年

六年春疫大熟 七年大稔是年八月以山西連歲豐

登

特詔免通省庚戌年地丁銀四十萬兩以示勸勵冬十有
一月又以民人踴躍急公辦駱駝鞍屨不勞而集復頒

恩詔蠲免通省辛亥年地丁銀二十萬兩 八年大熟

九年大有麥秋禾大豐瑞穀盈野 十年洪厓子萬年

燈復見是科壬子張景瀨登鄉薦

乾隆元年大有麥 八年閏四月初八日戌時有星自東

北流於西南光明照地頃之聲震如雷夏五月大熱道

路行人多有斃者京師更甚浮人在京貿易亦有熱斃者六月大雨迅雷城內幼童年十六被龍擊斃西鄉亦有震驚人畜者是歲鄰封被雷震驚者甚多秋彗星見西方色白長三丈餘闕月乃沒九年六月初二日午刻大雨有龍飛入民間樓舍須臾煙火內起樓盡焚十一年初三日大雪十年正月朔日雨雪十二日有大星晨墜自東而西頃之有聲四月初四日地微震

浮山縣志卷之三十五

兵氛

易云安不忘危治不忘亂蓋不忘則似懼傲懼則防汎守禦之謀豫焉浮山僻居郡城東隅雖非用武者必爭之地然繇後魏以來戰爭攻陷之事止自不乏思患豫防實固圉保民者之要也因備列之志兵氛

後魏天興五年正月帝聞姚興將寇邊大簡與徒詔并州諸軍積穀於平陽之乾壁五月後秦安北將軍姚平

率眾四萬來侵平陽乾壁為平所陷 姚平攻乾壁六

十餘日壁中泉少失守乃陷之 魏平陽太守貳塵入

侵河東與遣姚平等率步騎四萬往 魏平等軍次河東

與遣唐方姚良國率關中勁卒為平 殺繼姚緒統河東

見兵為前軍平攻魏乾城陷之遂據 柴壁 姚興傳

唐秦帝五年十一月詔驍騎將軍延普 城乾城

梁天祐五年九月晉遣周德威攻晉州 敗梁軍於神山

明崇正五年流賊紫金梁率眾數萬逼 城時知縣李乘雲

善射殪賊渠魁餘黨悉逐 劫掠居民

齊國賢欲以為謀主國賢怒罵不絕 久之

十七年流賊攻振賊破署偽官執高 家先送偽衡山伯

不屈殲之

國西順治六年己丑土寇滋擾浮邑為 賊所困邑武庠

士鳳成東城三月二十日與賊戰於 北石村殺傷

次日逐賊於崖村時賊據兩山為險 知縣王廷

率鄉兵禦之我兵恃眾緣崖而上秦 士鳳獨當一面

勇先登賊始拔獲軍不舉力竭被殲從行義勇劉
武生喬瑾奮身救之晉遇害邢翟之夜李先春領鄉兵
冒險衝陣揮大刀連砍數賊以誤建厄石而蹶遂被
子李今姓亦同時戰死是歲大同總兵姜瓖叛分遣賊
首攻平陽不克尋攻各州縣遍掠鄉村浮民各營土堡
損全者甚衆

浮山縣志卷之三十一

雜志

邑乘一書凡有關於茲土者既已分類詳記矣若夫事
近荒誕載在簡編探奇者亦每津津而樂道之爰博採
廣收另爲一帙當作齊諧觀並以佐譚鋒云爾志雜志
高辛妃訾氏八夢日而生八子號八元實沉闕伯居曠林
干戈日尋后帝不臧遷闕於宋是爲商沉於大夏是爲

參異苑

高辛時丹邱之國獻瑪瑙甕以盛甘露甕至堯時猶存甘

露盈而不竭以頒羣臣舜時漸減遷寶甕於衡山臨汾縣志

堯寄於伊長孺家從母所居故姓伊者宜齋野乘

堯登山山湧一泉味如九醞色如玉漿號曰醴泉酒譜

帝堯帝嚳之子姓伊祁氏年十五佐兄摯封唐侯二十卽

帝位始封於唐故號陶唐今唐縣定州境以唐水名也

其曰順德唐山者訛

帝堯臺帝嚳臺丹朱臺帝舜臺各二臺四方在崑崙東北

相傳天子巡狩所經過夷狄慕聖人恩德輒共為築立

臺觀以標顯其遺跡也夫以丹朱之名與三大聖並其

見重於遠人如此山海經

禹貢八州皆有貢物而冀州獨無之冀卽今之山西土瘠

天寒生物鮮少蓋自古為然燕間錄

趙氏之先與秦共祖至蜚廉子季勝生孟增是為宅皐狼

皐狼孫造父御穆王有功賜以趙城由此為趙氏造父

以下六世至奄父生叔帶去周如晉事晉文侯始居晉

國五世而生趙夙晉獻公十六年滅耿霍魏賜夙耿夙
生共孟共孟子趙衰事文公爲原大夫居原歷盾朔武
景叔四世生鞅是爲簡子晉頃公十二年分祁氏羊舌
氏邑爲十縣各令其族爲之大夫鞅卒次子無恤立是
爲襄子襄子元年平代地封鞅長子伯魯子周爲代成
君四年與智伯韓魏盡分范中行地復與韓魏滅智伯
分其地於是趙北有代南并智氏疆於韓魏襄子卒代
成君子浣立是爲獻侯治中牟始列爲諸侯襄子弟桓

子逐獻侯自立於代一年卒國人復迎立獻侯三傳至
敬侯始都邯鄲敬侯九年與韓魏共分晉地歷成侯昭
侯至武靈王攘地北至燕代西至雲中九原二十七年
立子何爲王是爲惠文王自稱主父惠文王二年主父
出代西遇樓煩王於西河而致其兵封長子章爲代安
陽君四年李兌平章之亂又二傳至幽繆王降秦
魏之先畢公高之後畢萬事晉獻公獻公滅魏封之從其
國名爲魏氏萬子武子事文公襲魏氏之後列爲大夫

治於魏子悼子徙治霍生魏絳晉悼公十一年絳徙安邑絳後五世爲魏桓子與韓趙共滅智伯分其地桓子之孫曰文侯斯文侯二十一年列爲諸侯子武侯擊十一年與韓趙三分晉子惠王罃三十一年徙治大梁歷襄哀昭安釐景湣假六世滅於秦

韓之先與周同姓其後裔事晉封於韓原曰韓武子武子後三世有韓獻子厥從封姓韓氏子宣徙居州晉頃公十二年與趙魏共分祁氏羊舌氏十縣宣子子貞子徙

居平陽至孫康子與趙魏共敗智伯分其地地益大於諸侯康子孫景侯六年與趙魏胥爲諸侯歷三世爲哀侯哀侯元年與趙魏分晉國二年徙都鄭傳懿昭宣惠襄釐桓惠暨王安七世安虜於秦

甘露三年上思股肱之美乃圖畫其人於麒麟閣唯霍光不名曰大司馬大將軍博陸侯姓霍氏

以上三段西漢書

霍光妻遺淳于衍蒲桃錦二十四疋散花綾二十五疋綾出鉅鹿陳寶光家寶光妻傳其法霍顯召入其第使作

之機用一百二十鑷六十日成一疋疋直萬錢又與走

珠一排綠綾百端錢百萬黃金百兩爲起第宅奴婢不

可勝數衍猶怒曰我爲爾成何功而報我若是西京雜記

霍光園中鑿大池植五色睡蓮養鴛鴦三十六對望之爛

若披錦故相逢行曰鴛鴦七十二羅列自成行真率筆記

金山忠烈王漢博陸侯姓霍氏吳孫權時一日致疾黃門

小豎附語曰國主封界華亭谷極西南有金山鹹塘湖

爲民害民將魚鱉食之非人力能防金山故海鹽縣一

旦陷沒爲湖無大神護也臣漢之功臣霍某也部黨有

力能鎮之可立廟於山吳王乃立廟建炎間建行宮於

當湖賜名顯應尤著鄉民祈禱輒應部下錢侯尤爲靈

著王以四月十八誕辰浙之東西商賈舟楫朝獻踵至

自八四月至中旬末一市爲之鼎沸聞有設祭於松柏

間祀其先亡慟哭而反謂之小嶽廟廟中鉄鑄四聖由

海而來至今見存括異志

天福初桑維翰以翰林學士尙書禮部侍郎知樞院事知

院之名始此 晉書


桑維翰為相常惡獲鹿賈緯待之甚薄漢隱帝時詔緯與王申寶儼等同修晉高祖出帝漢高祖實錄緯為維翰傳言維翰死有銀八千錠翰林學士徐台符以為不可數以非緯緯不得已更為數千錠 賈緯傳

桑維翰壽辰韋潛德獻太湖石一塊上有鐫字金飾曰寵

仙 清異錄

雍熙二年始置翰林侍讀學士以邢昺為之 宋史

景德四年以翰林侍講知曹州侍講學士外使自昺始焉自五代以來凡樞密院官皆文武參用大中祥符七年以王嗣宗曹利用並為檢校太保充樞密副使亦不帶正官編修之名古無之慶歷四年史館王洙都承旨單士寧編修樞密院例冊編修之名自此始



浮山縣志卷之三十七

御製

聖祖仁皇帝御製訓飭士子文

國家建立學校原以興行教化作育人材與至渥也朕臨
御以來隆重師儒加意庠序近復慎簡學使釐剔弊端
務期風教修明賢才蔚起庶幾模範作人之意乃比年
士習未端儒效罕著雖因內外臣工奉行未能盡善亦
由爾諸生積錮已久粹難改易之故也茲特親製訓言

再加警飭爾諸生其敏聽之從來學者先立品行次及
文學學術功原要有故爾諸生幼聞庭訓長列宮牆
朝夕誦讀寧無講究必也躬修實踐砥礪廉隅敦孝順
以事親秉忠貞以立志窮經考業勿雜荒誕之談取友
親師悉化惰盪之氣文章歸於醇雅毋事浮華執度式
於規繩最防蕩軼子矜佻遠日昔所幾苟行止有虧雖
爾書何益若夫宅心弗淑行已多愆或蜚語流言傳制
官或隱器包訟出入公門或唆撥姦猾欺孤凌弱或

招呼朋類結社邀盟乃如之人名教不容鄉黨勿
倖脫褫朴濫竊章縫返之於衷寧無愧乎況鄉會科名
乃掄才大典關係尤鉅士子果有實學何患困不逢年
顧乃標榜虛名暗通聲氣夤緣詭遇罔顧身家又或收
竄鄉貫希圖進取囂凌騰沸網利營私種種弊端深可
痛恨且夫士子出身之始尤宜正若茲厥初拜獻便
已作姦犯科則異時敗檢踰閑何所不至又安望其秉
公持正爲國家宣猷樹績膺後先疏附之選哉朕用嘉

惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志寧俟他求哉若視爲具文玩愒勿做毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國家外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難追勿謂朕言之不預也
多士尙敬聽之哉

世宗憲皇帝御書諭直省督撫等官勅

朕惟撫養元元之道足用爲先朕自臨御以來無刻不厯念民依重農務本業已三令五申矣但我國家休養生息數十年來戶口日繁而出土止有此數非率天下農民竭力畊耘兼收倍獲欲家室盈寧必不可得周官所載巡稼之官不一而足又有保介田畷日在田間皆爲

課農設也今課農雖無專官然自督撫以下孰不兼此任也其各督率有司悉心相勸並不時咨訪疾苦有絲毫妨於農業者必爲除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化爲勤矣再舍傍田畔以及荒山不可畊種之處度量土宜種植樹木桑柘可以飼蠶聚粟可以佐食楡桐可以資用卽榛楛雜木亦足以供炊爨其令有司督率指畫課令種植仍嚴禁非時之斧斤牛羊之踐踏

奸徒之盜竊亦爲民利不小至孳養牲畜如北方之羊南方之彘牧養如法乳字以時於生計不無裨益總之小民至愚經營衣食非不迫切而於目前自然之利反多忽畧所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官宜各體朕惓惓愛民之意實心奉行倘視爲具文苟且塗飾或反以擾民則尤其不可也

世宗憲皇帝聖諭廣訓序

書曰每歲孟春道人以木鐸徇於路記曰司徒修六禮以節民性明七教以興民德此皆以敦本崇實之道爲牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外興仁講讓革薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於畊桑作息之間本末精粗公私鉅細凡民

情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕纘承大統臨御

兆人以

聖祖之心爲心以

聖祖之政爲政夙夜黽勉率由舊章惟恐小民遵信奉行久

而或怠用申誥誠以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多質樸無非奉
先志以啓後人使羣黎百姓家喻而戶曉也願爾兵民等仰
體

聖祖正德厚生之至意勿視爲科條號令之虛文共勉爲謹
身節用之庶人盡除夫浮薄囂凌之陋習則風俗醇厚
家室和平在朝廷德化樂觀其成爾後嗣子孫並受其
福積善之家必有餘慶其理豈或爽哉

世宗憲皇帝諭州縣勅

朕惟國家首重吏治爾州牧縣令乃親民之官吏治之始
基也貢賦訟獄爾實司之品秩雖卑職任綦重州縣官
賢則民先受其利州縣官不肖則民先受其害膺茲任
者當體朝廷惠養元元之意以愛民爲先務周察葑屋
綏輯鄉里治行果有其實循卓自有其名非內聚賄而
外干譽謂之名實兼收也全省吏治如作室然督撫其
棟梁也司道其垣墉也州縣其基址也書云民爲邦本
本固邦寧夫所以固邦本者在吏治而吏治之本在州

縣苟州縣之品行不端猶基不立則室不固庸有濟乎
皇考臨御六十一年灼知州縣特行引見咨詢明試至詳至

慎其有廉能之員亦不次超擢以示鼓勵今海內羣黎
皆

皇考所懷保也朕膺

宗社重寄思續

皇考之治功惟爾州縣諸臣具有父母斯民之責其為朕立
之基址以固邦本焉誠能潔已奉公實心盡職一州一

縣之中興仁典讓教孝教忠物阜民安刑清訟簡朕將

陞之朝宁用作股肱如或罔念民瘼恣意貪婪或朕削

肥家或濫刑肆虐或借刻以為清或恃才而多事或諂

媚上司以貪位或任縱胥吏以擾民或徇私逞欲以上

虧國帑王章具在豈爾貸歟更有任州縣時私肥已橐

而漫云且俟顯榮方立名節者其與初市清名晚而改

操之人何以異哉至於錢糧關係尤重絲毫顆粒皆百

姓之脂膏增一分則民受一分之累減一分則民沾一

分之源澤前有請暫加火耗抵補虧空帑項者

皇考示諭在廷不允其請爾諸臣其聞之矣今州縣火耗任意加增視為成例民何以堪乎嗣後斷宜禁止或被上司察核或被科道糾參必從重治罪決不寬貸夫欲清虧空之源莫如節儉正直節儉則用無不足正直則上官不可干以私若賸小民之生以飽上官之貪欲冒不測之罪以快一時之奢侈豈砥礪廉隅為民父母之道乎爾州縣等官其恪共乃職勿貽罪戾毋謂地遠官卑

朕不及察其賢否也

聖祖仁皇帝御書

文廟

萬世師表書

世宗憲皇帝御書

生民未有書

高宗純皇帝御書

與天地參書

仁宗睿皇帝御書

聖集大成書

宣宗成皇帝御書

聖協時中書

文宗顯皇帝御書

德齊博載

同治元年

皇上御書

聖神天縱

歷朝御製

漢

宣帝嘉霍光詔

大司馬大將軍博陸侯宿衛孝武皇帝三十餘年輔孝昭
皇帝十有餘年遭大難躬秉義率三公諸侯九卿定萬世
策以安宗廟天下蒸庶咸以康寧功德茂盛朕甚嘉之復
其後世疇其爵邑世世毋有所與功如蕭相國

宣帝封霍雲詔

宣成侯光宿衛忠正勤勞國家善善及後世其封光兄孫
中郎將雲為冠陽侯

唐

元宗龍角山慶唐觀紀聖銘

神也者妙有物而為言化也者應無方而成象言豈立神
之主象微宰化之知苟言象之不存焉則神化或幾乎息
矣窮神而極化者豈唯空空之人乎我遠祖元元皇帝道
家所號太上老君者也建宗於無有立行於不昧知雄守

雖爲天下谿知白守辱爲天下谷故能長上古而日新雕
象形而化溥正萬物而不爲戾澤萬代而不爲仁巍乎不
睹其巔深乎不測其極復歸無物存教遠以立言奄有大
清感聖期以利見肇我高祖之提劍起晉太宗之杖鉞入
秦鵬搏風雲麟鬪日月夏臣醜而已去殷鼎輕而未徙老
君廼洗然華皓白驥朱髦見此龍角之山示我龍興之地
語絳州大通堡人吉善行曰吾而唐帝之祖也告吾子孫
長有天下于是開赤伏而萬姓宅心一麾白髦而六合

大定傳曰有聲之聲不過百里無聲之聲延及四海非夫
神唱明德翁叶人祇者與善行以武德三年二月初奉神
教渺無明徵莫之敢洩至四月老君又見曰石龜出吾言
實于時太宗爲秦王討宋金剛搃戎汾絳晉州長史賀若
孝議以其狀上啓遽使親信杜昂就山禮謁俯仰之際靈
見察焉昂馳還曰信矣廼遣昂善行築駟表上北至長安
適會郎州獻瑞石如龜有文曰天下安千萬日高祖徵其
二異封善行朝散大夫命舍人柳憲往祠焉玉帛旣陳尊

儀復見其始覲也杲杲炁炁若紅峯綠嶺吐春日之光景
其卻隱也蕭蕭條條若雨息雲消視秋天之沉澹來莫知
其所自去莫辨其所往出于寂寞入于惚恍蓋不可得而
詳諸汾陽之龍角山者天帝降福之處高祖用師之道上
有華池靈府下有石穴洞宮氣接茹射集神仙之別館脈
通霍鎮灑灑玉之隣家高祖以鸞轡頻廻霓裾累襲故版
廟于行過之所割壇于受命之場刻飾聖宮彩繪真衛神
光離合激陸宛轉于空間雲氣踟躕笙磬往還于天路因

改浮山縣名神山焉志靈應也是歲仲秋及五年三月晉
州奏老君言我毫廟之中枯柏更生子孫當王又云我神
兵助軍收劉黑闥立夏當平事過如言皆先事之識也示
後太宗真觀削喬雲泊于廟宇高宗垂拱削卿雲涌于神
座今又祠中柏樹蒲萄衰而托根門端根木枯枝蒼而還
茂疊黛豐本瑛翠繁樹聚祥煙之青霽黝黝一色散佳氣
之葱菁鱗鱗萬重識者以爲太和暢陳朽之徵工會納殊
隣之象懼彼虛應播然夕陽朕演靈金根纂命璿宸舊學

道記嘗味至言是用假途禮樂託宿仁義尋末以窺本澄
粗以詣精爲無爲于此心事無事于天下而宗稷大福寔
縣小康實上祖惠無疆之休亦下人率自然之化夫維幽
宮昭見偉事也神告帝符瓌瑞也發祥善行吉類也慶雲
聖代鴻齠也戎菓附植合異也槁幹華滋蒸熾也此六者
興王之嘉祉曠歷之絕紀者也朕不敏頗聞君子之教矣
繼其後者天其祖習其訓者父其師揄揚道德情存孝敬
商頌美乎成湯周雅尊乎后稷先王之舊典也吾豈墜其

文哉夫戴角之類龍爲之長羊也定形而不易龍也神化
而無端龍蓋五土之精國家棄土而王故改山號名龍角
爲廼銘金石以彰靈變詞曰思文聖祖元默靈聲混兮無
名超兮至清清入神舍名捐物假身尊三元後有天下高
祖鳳翔雲舉晉陽太宗龍戰風趨秦旬龍角僊都王師戒
途聖形入有神言出無瑤衣玉騎告帝天符神方據我人
亦來蘇廼立清室微微謐謐衆仙停蹕廼興慶雲氤氳氳
氳再瑞明君庭有柏兮遠菓寄秀門有根兮瓌條更茂顧

懋非德蒙神之祐誦我道經介我神聽繼明五聖禋事三
靈請從格言天德出寧大道幽蔭湛慈廣接意路何階言
汗難涉化有影響神無華葉開元十七年太歲在己巳九
月己丑朔三日辛卯建皇太子鴻長慶三年三月十八日

是

侍兼御史大夫賜紫金魚袋李寰
軍使朝議郎行內侍省內府局丞員外置同正員上柱
國賜緋魚袋吳再和
榮軍監鐵治使朝議郎行內侍省內府局丞張令縉
開府儀同三司上柱國寧王憲

皇弟太保上柱國薛王業
皇堂兄上司空上柱國邠王守禮

皇子兼河西諸軍州經畧節度等大使慶王潭

皇子單于大都方軍節度大使兼關內道支度營田等大

使惠王浚

皇子太原牧太原諸軍州節度大使河東道支度營田等

大使棣王洽

皇子幽州大都督河北道諸軍州經畧節度大使兼支度

營田等大使鄂王清

皇子京兆牧持節隴右道諸軍州經畧節度大使兼支度

營田大使榮王湜

皇子廣州都督兼嶺南五府經畧大使光王浚

皇子河南牧儀王維

皇子安東都護平盧軍節度大使支度營田兩藩等大使

穎王雲

皇子荊州大都督永王澤

皇子益州大都督劔南諸軍州節度大使兼支度營田等
大使壽王清

皇子安西大都督護持節磧西節度大使四鎮瀚海經畧
支度營田等大使延王泗

皇子持節揚州大都督盛王湊
皇子濟王溢

禮部尚書朔方軍節度等副大使信安郡王稹
左威衛大將軍員外置同正員上柱國嗣舒王津

衛尉卿員外置同正員嗣許王瓘
宗正卿員外置同正員嗣徐王瓘

宗正卿員外置同正員嗣鄭王希言
宗正卿員外置同正員嗣彭王志珪

宗正少卿員外置同正員同安郡王洵
太僕卿員外置同正員汝陽郡王淳

太僕卿員外置同正員河東郡王沂
國子祭酒員外置同正員嗣韓王訥

太子僕員外置同正員潮陽郡王宗暉

太子贊善大夫員外置同正員樂安王洋

滄州刺史兼海軍使嗣魯王堅

銀青光祿大夫守兵部尚書兼中書令河西節度經畧支
度營田九姓長行轉運等副大夫仍知節度事判涼州

事赤水軍使上柱國蕭嵩

中大夫守中書侍郎同中書門下平章事兼御史大夫裴
光庭

中散大夫守黃門侍郎同中書門下平章事上柱國宇文
融

左常侍上柱國畢國公竇璣

左常侍充東都副留守崔西

特進行尚書左丞相集賢院學士修國史上柱國燕國公
臣張說

奉勅題御製御書字開府儀同三司行尚書右丞相上柱

國廣平郡開國公宋璟

藝文

特進新羅國王金興光

特進龜茲王天山郡開國公白孝節

特進永壽郡王沙陁輔國

太子少傅上柱國安隅縣開國侯源乾曜

太子少保上柱國交國公陸象先

戶部尚書上柱國中山郡開國公王浚

刑部尚書上柱國固安縣開國子盧從原

工部尚書上柱國武城縣開國男克東都留守崔隱甫

太子賓客上柱國正平縣開國子裴淮

太子賓客上柱國異國公竇希泳

太常卿上柱國李暲

秘書監上柱國王詢

秘書監員外置同正員 都尉薛鏞

檢校光祿卿上柱國裴觀

衛尉卿安定縣開國伯皇甫忠

衛尉卿員外置同正員駙馬都尉榮陽縣開國公鄭萬鈞

大鴻臚卿上柱國李朝隱

鴻臚卿員外置同正員駙馬都尉瑯琊郡開國公王繇

鳳陽縣開國侯揚崇禮

國子祭酒上柱國楊瑒

開府儀同三司兼殿中監上柱國霍國公王毛仲

少府監安昌縣開國子馮紹正

京兆尹上柱國高 縣開國男李尚隱

河南尹上柱國霍延玉

太原尹上柱國姑臧縣開國伯北都留守李休

銀青光祿大夫行侍內省內侍員外置同正員上柱國尹

鳳祥

勅檢校慶唐觀使銀青光祿大夫使持節晉州諸軍事晉

州刺史上柱國晉陽縣開國男臣白知慎

勅建造摩勒龍角山紀聖碑使朝議郎守尚書主客郎中

集賢院學士翰林院供奉輕車都尉贊諭皇太子兼

待慶王忠王棟王鄂王榮王光王儀王穎王永王文章
臣召向奉勅碑陰并建碑年月

驃騎大將軍兼右驍衛大將軍員外置同正員內侍上柱
國韓國公揚思勗

冠軍大將軍守右監門衛大將軍知內侍上柱國渤海郡
開國侯高力士

冠軍大將軍行右監門衛大將軍員外置同正員知內侍
上柱國上黨縣開國侯黎敬仁

鎮將大將軍右驍衛大將軍上柱國柳城郡開國公葛福
順

冠軍大將軍右驍衛大將軍兼判將作大匠岳陽縣開國
公

冠軍將軍上柱國廣平縣開國公程伯

宋

真宗太上老君混元上德皇帝冊文

維大中祥符七年歲次甲寅正月戊子朔二十一日戊申

嗣天子恒謹再拜稽首言伏以先天地母萬物大道強名

而混成一希夷總衆妙元聖無私而獨運肆結繩之上世

逮垂旒之應期必敦清淨之風乃洽淳熙之化伏惟太上

混元皇帝神凝氣祖粹蘊帝先紀學以演真宗襲明而開

道與玉虛善應俾炎皞以得師冲用無方歷商周而隆跡

聖母發祥於夢日宣父興歎於猶龍微言闡幽大像垂教
二儀長久本清寧而不居兆庶樂康資恬淡而無欲首出
萬古式是百王天付生民運興有待烈祖之開創神宗之
治平尚慈儉爲永圖遵朴素爲常道慶鍾長發猥及渺躬
寶籙歲蕤惟新於元命玉音昭晰親覲於神期喻皇世之
有開示高真之幽贊上帝克享妙本是依然則造物不私
焉知日用爲民祈福度稟上仁是敢仰止靈區虔伸頌拜
周爰徽號益表欽崇夫恍惚無形生三爲大茲之謂混元

淵默守中吹噓萬化茲之謂上德雖善貸常存於不有而
可名恭薦於至誠謹攝太尉推忠協謀同德守政佐理功
臣王旦奉玉冊玉寶上加徽號曰太上老君混元上德皇
帝伏惟因大成而曲全務守道而貴德儲祉善慶保鴻基
之配天鑒降勤行佐冲人之治國萬方福壽世祚千億謹

言

真宗訓廉銘

二銘退思堂有刻
石不知沒於何時

周典六計吏治條陳以廉爲本乃良而循肆彼貪虐與豺

虎均肥於其家多瘠吾民縱違於法愧其冠紳貨悖而入
蓄及後人我朝忠厚黜貪爲仁咨爾羣辟是訓是遵

訓刑銘

民吾同胞疾痛猶己報虐以威刑非得已仰惟祖宗若保
赤子明謹刑獄惻怛溫旨金科玉條毫析銖累夫何大吏
蔑棄法理逮於郡邑濫用笞箠興聽朕言式克欽止

徽宗顯施廟勅

尙書省牒平陽府神山縣顯施廟牒奉勅山川之神能出

雲雨慰民之望以惠一方必報其功寵以封號守臣言爾
威靈有赫甘澤應祈是用錫爵爲侯式隆祀典其尙歆茲
休命大芘斯民俾屢獲于豐年則無愧于廟食宜特封嘉
潤侯牒至准勅故牒宣和七年七月

明

世宗敬一箴并序

夫敬者存其心而不忽之謂也元后敬則不失天下諸侯
敬則不失國卿大夫敬則不失其家士庶人敬則不失其

身禹曰后克艱厥后臣克艱厥臣五子之歌有云予臨厥
民如朽索之馭六馬爲人上者奈何不敬其推廣敬之之
言可謂明矣一者純乎禮而無雜之謂也伊尹曰德惟一
動罔不吉德二三動罔不凶其推廣一之之言可謂明矣
蓋位爲元后受天付託承天明命作萬方之君一言一動
一政一令實理亂安危之所繫若此心忽而不敬則此德
豈能純而不雜哉故必兢兢懷畏慎于郊禋之時儼神明之
鑒享發政臨民端莊戒謹惟恐拂于人情至於獨處之時

思我之咎何如改之不吝思我之德何如勉而不懈凡諸
事至物來究夫至理惟敬是持惟一 是協所以盡爲天之
予之職不忝厥祖厥親由是九族親之黎民懷之仁澤覃
及於四海矣朕以冲人纘承丕緒自諒德惟寡昧勉而行
之欲盡持敬之功以馴致乎一德其先務又在虛心寡欲
驅除邪逸信任耆德爲之匡輔敷求善人布列庶位斯可
行純王之道以坐致太平雍熙之至治也朕因讀書而有
得焉乃述此以自勗云人有此心萬理咸具體而行之惟

德是據敬焉一焉所當先務匪一弗純匪敬弗聚元后奉
天長此萬夫發政施仁期保鴻圖敬怠純駁應驗頓殊徵
諸天人如鼓答桴朕荷天眷為民之主德或不類以為大
懼惟敬惟一執之甚固畏天勤民不遑寧處曰敬惟何怠
荒必除郊則恭誠廟嚴孝趨肅于明廷慎于閒居省躬察
咎儆戒無虞曰一維何純乎天理弗參以三弗貳以二行
顧其言終如其始靜虛無欲日新不已聖賢法言備見諸
經我其究之擇善必精左右輔弼貴于忠貞我其任之

別必明斯之謂一斯之謂敬君德既修萬邦則正天親民
懷永延厥慶光前垂後綿行蕃盛咨爾諸侯卿與大夫以
至士庶一遵斯謨主敬協一罔敢或渝以保祿位以完其
驅古有盤銘曰接心警湯敬日躋一德受命朕為斯箴拳
拳希聖庶幾湯孫底于嘉靖

代宗遣祭帝堯文

皇帝謹遣太常寺寺丞李希安致祭於帝陶唐氏曰茲者
山西民困極矣加以久旱穀用無成民生罔賴此誠予之

不德所召惟神至仁獨不動憫念乎況素以庇民得祠者
尤當不可緩也尙望廣布霖雨大作豐年非獨予免夙夜
憂惶神亦可隆始終惠譽特攄虔懇專俟感孚謹告

朱巖戾止碧峯告我本支降而福應王人肯搆多新輪奐
之功仙客棲心遂得窈窕之室旣而龜趺峙岳象帝當陽
軒窻窻而金碧明殿宇迥而塵埃絕煙霞不老旁連珠玉
之山草木有靈信是神仙之境壬午歲自季春不雨迨於
林鐘旱魃益驕新谷將瘁幾失民望咸憂地征都維那梁
稠密跡隱大田傑出白社乘見善則遷之勢慕當仁不讓
之心因率乃至誠扣于仙路而曾不終日已感全靈油雲
俄起于大空膏澤遂周于下土連宵迨旦布葉流根佇多

稼之如雲是穠是藂終餘糧之棲畝如坻如京雖元祖之
靈感有聞亦由我后貶食罪已自然之應也于是鳩衆人
命良工編金裝太上老君一尊五彩裝侍後十事兼修常
住房庫一十二間莫不德音如在嚴飾有加照翠羽而躡
蹻面紫金而璀璨列仙儼若將趨丹闕之朝大聖穆然高
據五雲之座旣休厥作益壯其猷乃徵地珍之文式敘丹
青之頌報大君之亭育斯謂良闕闡老氏之神明且酬前
志明宗張昭舉尊道貴德雪白蘭薰操心而不染脂膏御

物而盡懷仁惠盤根錯節自追虞詡之蹤絃而歌之迥洽
密人之政主簿孫方制縣尉李太素並桂堂先覺槐市上
流華其才子之辭實乃古人之行棲鸞屈致象雷方惜于
大賢振鷺高飛負展已虛于左席觀主徐子勤等脫屣筮
界並駕不宮名高赤水之珠光而不耀秀稟函關之氣久
而彌芳姑同勵于初心俄有終于盛事千里猥蒙見託深
愧謏才妄探衆妙之宗謬紀靈仙之跡天長地久庶借此
觀而永存進牘抽毫寧避通人之所誦銘曰邈哉大器先

天地生寂寥無聲莫知其名師諸后辟祖乃生成善行不恃元功自名其一於澤元祖時惟聖人與之借用能辨其真

簡編舉溢儒釋等倫像設有自泉流不眠其二山聳龍角觀

關慶唐聖駕載見仙跡重光北隣霍岳西接汾陽鸞鶴還

往煙翠交相其三早曠爰作人斯匪逞誠信洞啓靈威潛彰

獨彼災害告爾農穰我福孔夷何有不臧其四誰謂下民不

帝力雙柱盛容兼金潤色據几南面疑朝紫極霓節羽

天威儀揚抑其五元猷方遠我教益振徒觀其妙不測其神

載煥斯事用紀翠珉識者不諂將期億塵其六朝散大夫誌

太理評事張昭舉文林郎守主簿兼權知縣事黃元轍文

林郎守主簿孫方制權知縣尉事李太素鄉貢進士王千

里撰雲水道士黃慶書淳化元年三月二十九日

天聖宮紀事碑

孫景文

伏惟太上老君混元皇帝青牛命駕紫氣度關執大象以

臨人百王共貫烹小鮮而治國千古同規既推輪於衆妙

之門遂脫屣於三清之境逮夫有唐之受命也肇從全晉

起革暴隋止海水之橫流非徒夏禹補天綱之幅裂豈特
媧皇尋追五讓之蹤旋定一戎之業則高祖神堯皇帝迺
太上三十四代孫也猗蘭葉茂仙李陰穠發源雖自隴西
敦本實繫若縣老君以唐武德二年二月內降於平陽神
山縣龍角山之根子樹下衣冠儼若美髮皓然白馬在前
耀熒煌之朱鬣青童侍側對綽約之紅顏時里民有吉善
行者見而拜之因謂善行曰爾為吾言於唐皇帝言即汝
之遠祖也汝方為太平天子國祚靈長吾已大勅陰兵助

汝破賊言訖不見善行既蒙神告即詣長安時神堯甫定
閩中方圖外畧既聞所奏知曆數在躬乃命左親都督杜
昂寅奏皇華就於本山致祭精誠上達盼蠻下同俄於大
樹之間再見猶龍之表至於告諭又極丁寧神堯既嘉受
命之符且思尊祖之義乃命有司於所見之地建立祠堂
仍初四時備禮享獻其後太宗降王世充於洛邑擒竇建
德於武牢自餘羣寇相次殄滅六合大定不出數年則是
聖祖之貽謀雲孫之受慶影響之應豈不昭昭哉開元中

明皇帝荷六葉之丕苗席千齡之景運感昊穹之靈祝恢
烈祖之耿光十四年七月始下詔改老君廟爲慶唐觀仍
御書觀額及碑文以賜之宸翰縱橫寶章飛動金聲玉振
吐天上之蘭辭鵠返鸞迴降日中之玉宇麗藻朝輝於嚴
齋銀鈎夜燭於星辰遐稽善美之言迥極天人之際觀內
正殿曰老君殿老君殿之次曰三清殿三清殿之次曰三
清殿內有高祖至明皇帝六聖玉容左右鸞翔東西鳳翥
上殿觀顏之像若照千官垂衣端拱之儀如臨萬國父堯

子舜其在茲乎先是斯觀營繕之初困於無水公輸爲之
失色衆人於焉疚心無何山椒之間瀑泉噴湧枉道屈曲
流於觀中號曰華池大濟工役旣人工之告畢而神瀆之
赤枯皇朝景德二年二月十五日有甘露降於老君殿之
前柏樹凝如天醕湛若帝漿旣呈五色之祥迥掩三危之
味尋又有白鶴來翔碧空雅同遼水之歸不讓華亭之唳
聲震遐邇幾乎浹旬符瑞至多不可殫紀二千石旣累蒙
茂祉尋達聖聰俄奉璽書俾如締構自正殿之外凡蓋前

後三門暨道院行廊之所內外大小總三百餘間初觀之
東南其峯峭拔藤蘿盤屈素有洞宮名之珍珠多歷年所
唐大曆中嘗勅以玉簡金龍投於此洞至晉天福年間有
奉使新羅者及至其國見向之二寶俱汎出水中既還長
安因表以進之又其洞之內每風恬霧霽往往聞笙簫管
磬之音若鈞天九成髣髴在耳厥後時罹凶歉郡起螟蝗
一方無蠹賊之虞比屋有京坻之望雖上資於帝力實允
賴於神休天聖五年夏四月詔改慶唐觀爲天聖峩峩秘

宇陋白鶴於南山肅肅珍臺掩青羊於西蜀輪奐壯麗稱
爲最焉每歲月及正陽賞開八葉此邦士庶霧列星馳或
修香火以告虔或備蘋蘩而致潔口祝具矣福祐隨之蚩
蚩之民有足依怙六年道衆以斯觀自始崇葺垂三百年
蓋因高就基實去水逾遠汲取之事我勞如何今若大備
吉蠲式遵科教庶竭惟精之懇期延善利之祥於是樂佳
景之流行步綱之法寅祈太上欲浚靈長乃於道院之東
神厨之後方幸天從於人欲俄驚闢地以及泉厥味孔甘

可飲丹山之鳳其源不濁如分楚國之波雖二師之刻山
耿恭之拜井未之逮也自是齋殿之亭洒掃之資人無所
勞用斯不置非夫太上威靈所及疇能至是耶七年會令
尹東平呂君化元用卓魯之才出涖斯邑既與一官之職
尋躋三異之名與廣平焦君季卿共凜詔條叶宣風化苟
政有所缺力而行之一日自公之餘同詣斯觀周覽勝槩
嘆異久之因謂本觀都監賜紫道士梁志貞監觀賜紫道
士段見素曰此觀肇自皇唐迄於有宋雖代數悠邈而感

應滋多矧近奉天恩且更觀額而始終事迹紀述未遑蓋
求白地之文以志他山之石庶垂來裔不泯徽猷二君子
感慨是言欲圖不朽且以慎言素慕神仙之道粗知辨學
之源爰俾抑揚靡克諄讓含毫增愧謹作銘云混成之教
先天地生萬物之母三才之精猗歟老氏道不虛行赫赫
宗唐實稱後裔寅奉真源欽承寶位惟堯之都是爲福地
命氏考姓實惟賴鄉旣開兆朕乃建祠堂承襲欽奉煥乎
有光革廟爲觀五位辨方炎宋勃興誕膺駿命道冠百王

恩加億姓始以慶唐謂之天聖輪奐愈尊焚香益盛粵有
上士含和保真爰啓麗藻俾刻芳珉

元

陶唐清都萬壽宮事跡碑

教諭 王 庭

全真之門有主清都者亢道純梁道茲來謁曰先師元素
子以非常道立觀度人勤勞甚至今已神棲玄宅顧洪衍
之恩惜不可泯先生效儒業假撰述用彰厥美願也按善
狀師名志玄族孫氏俗爲河東萬泉人幼穎悟遭世變故

翻然入道蓬轉求師得寧神子張君於代之神岡躬禮爲
引度祇承元素之號及寧神遷治王屈之靈都師亦行丐
而南一夕夢遊清都境覺與謝智之流踪跡之忽遇今治
觀其岡阜宏敞樹木蔚茂適與夢同會駐鳥間爲故縣豪
趙貞趙鏜等衆聞知輒詣山尋訪訝爲異人以住持請遂
感動遠近接襟音者日有增新於是起堯殿於舊貫居右
別置混元殿并道院居左次之耕稼外土田數十頃有奇
爲常住資功甫告成請額於上嗣教清和真人署以清都

名宮師曰先定也其何敢辭居無何責付後事於門下希
真大師王志實與道純輩叶贊行之晚年歸寂靈都示不
忘本也志實等克遵遺命不墜先業至欲褒贊事功稱揚
父師足可嘉尙其餘憑藉聲焰星居四方者不必殫舉究
源委皆自元素之傳噫師之幻夢果何如哉意者謂志堅
行篤必有陰相神助然以丐食煉性立事紀功任人歸老
較之又何夢頃之囿哉合是數說不得不善以辨之仍繫
其詞曰道有名師寧神之嗣苟造物之所戲遽尋此而安

置聲聞漸馳其徒則朋從爾思其居則棟隆而竇猗歟新
歟其道尊其德貴壽則考名則遂可謂備矣雖未暇擬化
蝶乘風與槐安邯鄲百慮而一致也山石旣礱揭茲銘志
一則明永保爲國祈祥之地次以召後來者存念本知報
之意焉至元二十九年二月

